

Kerssangdiens Woordoordenking

Skriflesing

Numerie 10: 9 en 10

1 Kronieke 16: 1 - 7

1 Kronieke 25: 1 – 8

2 Kronieke 5: 11 - 14

Lukas 2: 8 - 14

Geliefde brs en srs en kinders

Almal van ons het al gesien hoe straal 'n oupa of ouma se gesig van liefde wanneer hulle 'n foto van hulle kleinkind uithaal om vir jou te wys! Hulle straal want die foto herinner hulle weer opnuut aan die wonderlike verhouding wat tussen hulle en die klein mensie ontstaan het!

Het julle geweet dat wanneer ons as gelowiges bymekaar kom en voor God musiek maak en sing dan gebeur dieselfde met God ons Vader! Hy straal telkens van liefde want ons sang en musiek word soos die foto wat God weer sien en Hom laat herinner aan ons as Sy Verbondsvolk! Die volk vir wie Hy lief is, die volk wat Hy gekies het en wat Hy gered het! Dit bring vir God groot vreugde en vir ons groot seën.

Daarom leer ons vanaand uit die teks dat ons musiek moet maak en sing want so bring ons onself telkens weer in God se gedagte sodat Hy ons in Christus verder kan seën.

Ja, ons musiek en sang in die erediens en vanaand hier is nie maar net om God te loof en prys en sy Naam groot te maak nie, **maar ook om ons in sy gedagte te bring!** In Num. 10 gee die Here vir Moses die opdrag om twee silwertrompette te maak wat vir 'n verskeidenheid van doelwitte gebruik is, maar ook om in die samekoms van die gemeente musiek te maak met 'n spesifieke doel! **Die musiek en sang moet ons in God se gedagte bring! Nie dat God ooit van ons vergeet nie!** Daarvan verseker Hy ons elders as Hy sê dat ons name op sy handpalms geskrywe staan! Maar wanneer God se kinders musiek maak en sing is dit is soos 'n foto wat God saamdra en dan uithaal om met groot vreugde gevul te word oor die verhouding wat Hy met sy volk het! Dat ons so in sy gedagte kom! Wat 'n wonderlike voorreg om onself so voor God te bring!

Ons sien in die Ou Testament dat die gelowiges aanvanklik baie erns gemaak het met hierdie opdrag van die Here. Ons het gelees hoe Dawid baie moeite gemaak het met sang en musiek toe hy die ark na Jerusalem gebring het en ook hoe sy beplanning met musiek en sang in werking gestel is met die inwyding van die

tempel! Wanneer God en volk ontmoet dan wil God opnuut in genade aan ons dink!
Wat 'n wonderlike voorreg!

Maar geliefdes, as gevolg van sonde en ons menslike swakheid het God se volk se musiek en sang deur die gang van die geskiedenis in die Ou Testament hierdie karakter verloor! Maar ten spyte van die feit dat die volk vergeet het om hulleself so voor God te bring, het God steeds aan ons bly dink! Dit is juis waarom God musiek en sang laat weerklink as Jesus gebore word! Die engelekoor wat die wonderboodskap van Jesus se geboorte aankondig as 'n boodskap van verlossing en genade aan wie? "Die mense in wie God 'n welbehae het"! Die mense aan wie God bly dink het en wat Hy nooit vergeet het nie!

God kom wys ons toe 'n foto van Hom sodat ons Hom nooit weer sal vergeet nie! Christus was die volmaakte beeld van ons liefdevolle Vader wat in 'n verhouding met sy volk getree het en hulle nooit sou vergeet nie! In Christus kan ons nou weer met groot vreugde en vrymoedig die opdrag van Num 10 hervat! Want Christus het die verhouding kom herstel en ons weer deel gemaak van die hemelse vreugde in God! Daarom gebeur dit dat wanneer Hy weer opvaar na die hemel na sy oorwinning om sy plek op die troon in te neem, dan is daar 'n magtige koor in die hemel wat God se lof besing!

En nou kan en moet ons elke keer wanneer ons in die erediens bymekaar kom, onsself weer so met ons musiek en sang voor God in gedagte bring – omdat Hy ons onthou het! Dit is tog die boodskap van Kersfees – God het ons onthou en vir ons 'n foto van Hom gestuur!

Kom ons maak dan vanaand musiek en ons sing om onsself vanaand en elke keer in die erediens so in God se gedagte te bring sodat Hy ons verder in Christus kan seeën met al die seëninge wat daar vir ons in die hemel opgesluit is. Sang en musiek is tog ook 'n gawe wat die Heilige Gees gee sodat ons hierdie opdrag van God kan uitvoer! Kom ons gebruik dit met oorgawe! Kom ons herinner onsself daaraan elke keer wanneer ons in die erediens sing! Ons kan so maklik in gewoonte verval en dat ons sang en die manier waarop ons dit doen, nie spreek van die wonderlike gebeurtenis wat daarmee gepaard gaan! Hoe kan ons onsself voor God bring met lang en stroewe gesigte terwyl ons sing – dit lyk nie eers asof ons dit geniet nie!

Geliefdes hoe kan ons dan nie vrolik musiek maak en met vreugde sing nie! Onthou weer die prentjie: van 'n stralende oupa of ouma met die foto van hulle kleinkind in die hand! So word God se vreugde stralend elke keer wat ons musiek maak en sing! Kom ons doen dit dan met oorgawe tot in ewigheid!

Amen